


南蠻繹史勘本



第三册




五	漢書門
一	
四	
六	
六	
八	
七	
册架函號類	

庫	文	閣	內
三		五	漢
八		二	書
二		一	
三		七	
架	册	號	類

內閣文庫	
番號	漢 5117
册數	18 (3)
函號	286 191






南疆繹史勘本卷三目錄

淺草文庫

雪川濫氏原本

古高易氏勘定



紀畧三

唐王

右閩疆紀畧第三○王英才本畧在藩服之時
已思有所施為及遭逢患難磨礪愈堅兩京既
覆枕戈泣血躬行節儉以裕兵食性喜文辭手
撰三詔御製祖訓後序行在縉紳便覽序皆典

雅可誦所至訪求書籍軍行亦載書數十乘聽
納諫說拔錢邦芑金堡於下僚置之言路欲其
有所開陳章奏朝至夕發或送后代批后亦讀
書通明識治體王嘗與之決事篤念舊恩不遺
纖微於從興諸臣恩澤尤渥不可謂非一時令
主也論者徒見其不能出關遂言好作聰明自
爲張大無人君之度此以成敗論耳夫鄭氏起
盜賊目無君上據有全閩富貴已盈始願亦不
及此而欲責以鞠躬盡瘁經營天下難矣王之

托於鄭氏所謂祭則寡人而已其二三心膂之
臣所藉以恢復者如黃道周蘓觀生皆儒雅可
觀祇將畧未優又束縛其手足不能一展所長
悲夫悲夫天之所廢誰能與之雖有忠義如之
何哉

南疆繹史勘本卷三

紀畧三

唐王太祖九世孫也諱聿鍵小字長壽其先唐定王
高帝第二十二子封於南陽父器盛唐世子追封裕
王母毛氏王生十二歲祖端王惑於嬖妾欲立其愛
子遂囚世子於承奉司王亦從之有大志雖處患難
而意氣不挫年二十有八尙未請名世子爲其弟壽
死端王諱之將傳國於次子分守道陳竒瑜入弔謂
王曰世子薨逝不明若不立其子事且露國法重

王懼始請名立爲世孫崇禎五年端王薨王襲位年三十一矣選妃曾氏諸生曾文彥女七年流寇入河南南陽當其衝城卑薄王捐千金謀修築知府陳俊豪勿授工王上言詔逮俊豪下獄王乃援潞藩例請增兵三千人設叅將一員以陳永福充之不許八年冬賊再犯南陽上疏言臣府護衛一千二百人近制以其半爲汴梁班軍給撫臣以下策使無誤惟明詔念臣困阨以全軍見還莊烈帝報之曰南陽番軍班直祖制已久朕不敢變時欲行宗室換授之法陳子

壯署禮部事執不可王貽書於子壯相駁難稱說典訓援據經傳皆有本廷臣顧勿及知特以爲諸侯王尚氣持異同而已子壯尋下獄衆口惜子壯者輒以尤王王亦薄公卿爲不足重而尊宗藩體統劾總督盧象昇不朝其所建請頗多與群臣相牴牾帝意亦不之善也九年秋八月京師戒嚴王率護軍勤王汝南道周以興制之不聽至裕州巡按御史楊繩武以聞旨下切責爲前鋒值寇亡內監三人乃返國十一日下部議廢爲庶人安置鳳陽高牆押發官同知張

有度欲以檻車行王自裁不殊至鳳陽守巷奄人索賄不得墩鎖以困苦之不勝其辱病幾殆曾妃割股以進始愈有司廩祿不時資用乏絕時有望氣者以高墻中有天子氣言於淮撫路振飛振飛假賑罪宗名入見王心異之王告以吏虐狀振飛上疏請加恩罪宗贍以私錢且責吏之無狀者王甚德之甲申春三月北都陷南京福王立大赦王出高墻禮臣請復王爵不許命徙駐廣西之平樂府乙酉夏五月行抵杭州而南都已覆王勸潞王監國不聽時鎮江總兵

鄭鴻逵自京口戶部主事蘇觀生自南都胥會于杭遂奉王入閩六月甲戌次浦城閏六月癸未福建各官迎謁于水口驛南安伯鄭芝龍禮部尚書黃道周福建巡撫張肯堂等三箋勸進王出御用銀一百五十兩令有司葺行宮勿擾民丁亥至福州監國建行在大廟社稷時鄭芝龍擁兵驕悍鴻逵欲王早正位以繫人心芝龍猶豫弗決羣臣多言監國名正建號宜遲不報丁未祭告天地祖宗卽位南郊以福建爲福京福州爲天興府布政司爲行殿大赦稱號隆武

追尊皇考爲皇帝妣爲皇后遙上福王尊號曰聖安
皇帝芝龍鴻遠俱進爵爲侯其弟芝豹封澄濟伯鄭
彩永勝伯並賜號奉天翊運中興宣力定難守正功
臣以黃道周爲吏部尙書武英殿大學士蘇觀生爲
吏部右侍郎兼東閣大學士福建巡撫張肯堂爲兵
部尙書兼左都御史何楷爲戶部尙書四川按察使
曹學佺爲禮部尙書福建巡按御史吳春枝爲兵部
右侍郎兼右副都御史周應期爲刑部尙書鄭誼爲
工部尙書黃錦爲禮部右侍郎並賜號奉天翊運中

興宣猷守正文臣各官進秩有差自道周外凡有聲
望者何吾騶蔣德璟黃景昉朱繼祚林欲楫姜曰廣
吳甡高弘圖路振飛曾櫻鄭三俊熊開元黃士俊顧
錫疇陳子壯林增志李先春陳洪謐等皆遙授閣輔
戎車轉側至者數人後林增志李先春先至同入閣
辦事王性素儉少遭患難旣卽位慨然以復仇雪恥
爲務布衣蔬食不御酒肉勅司禮監行宮不得以金
玉玩好陳設器用磁錫幃幄被褥皆布帛絕去錦繡
後宮無嬪妃御執事者三十人而已中宮懿旨選女

厨十人王聞之以爲擾民不許勤于聽政批閱章奏
丙夜不休上書陳言軍國大事者輒以手詔答之素
好讀書博通典故手撰三詔與魯監國書羣臣皆莫
能及重風節重文學收召名士不次擢用其志欲大
有爲於天下而阨于時勢乃爾感路振飛舊恩募能
致者賞千金給五品秩六月浙東張國維朱大典孫
嘉績方逢年等迎魯王監國于紹興時浙西已降附
大清兵方在江楚吏部侍郎楊廷麟兵部侍郎萬元
吉國子祭酒劉同升等以義師往來捍禦克復吉安

臨江等處遂加廷麟兵部尙書兼東閣大學士賜劍
便宜從事元吉副都御史總督江西湖廣諸軍以同
升爲南贛巡撫時王優禮鄭氏以閩事屬之芝龍長
子森入見竒其表賜國姓改名成功命提督禁旅以
駙馬都尉體制從事芝龍議陳戰守事宜自仙霞關
外當守者計百餘處應設守兵若干其戰兵以今冬
簡練明春出關一出浙東一出江右計兵二十餘萬
合閩粵餉不支一年仍請于兩稅正供內米一石預
借銀一兩令羣臣捐俸勸紳士輸助察府縣歷年積

穀銀兩未解者悉催赴行在遣侍郎科道徵發吏部
主事王兆熊兼御史督御餉急迫不輸者榜其門曰
不義於是閭里騷然矣芝龍又請清理寺田可得餉
八十萬王不聽戶部侍郎李長蘅請廣開事例從之
於是廝養隸卒皆得給劄授官猶苦餉不足守關兵
僅數百人率疲癯不堪用設儲賢館定十二科取士
以蘓觀生領之已而招徠者多挾邪士王亦厭罷王
以盜賊之興皆由貪吏虐民欲效高皇帝之法懲之
建陽知縣沈燦貪酷被劾特勅誅之輔臣申救不聽

于是人稍知懼廷臣日請出關王屢戒征期芝龍輒
以餉絀爲辭會賜宴大臣芝龍自以侯爵欲位首輔
上黃道周爭以祖制武職無班文臣右者終先道周
芝龍鞅鞅不悅周道知芝龍無意視師乃自請出關
號召義旅圖恢復王許之請兵請餉芝龍皆不應僅
給羸卒千人賚一月餉秋七月辛未道周率以行八
月乙酉頒祖訓五十七條于閣部科道大學士林欽
楫率諸臣表謝庚寅命肅鹵伯黃斌卿出鎮舟山命
吳江諸生孫文中賚手勅召路振飛及其至拜太子

太保吏兵二部尚書文淵閣大學士官其子太平爲
兵部員外郎壬辰冊曾妃爲后贈后父曾文彥爲吉
水伯癸巳行郊天禮於南郊芝龍鴻逵稱疾不從戶
部尚書何楷劾其無人臣禮宜正厥罪王喜楷敢言
命掌都察院事命婦朝后於太和殿邵武知府吳爇
煒推官朱健聞敵畏蕙棄城先逃下獄誅靖江王嘉
亨僭號桂林執巡撫瞿式耜幽之兩廣總督丁魁楚
遣總兵陳邦傳往攻封魁楚平粵伯加式耜兵部侍
郎式耜得釋卽令中軍焦璉合邦傳兵擒之行保甲

法於天興府定錦衣衛軍制設中前後五所每軍百
戶曰一威所八威所爲一禁軍時兵事皆掌于鄭氏
芝龍自知衆論不平不出關無以弭衆乃請以鴻逵
出浙東彩出江西各擁兵數千號數萬旣出關託候
餉仍駐不行鴻逵駐仙陽鎮慮有上書言事者嚴禁
仙霞關不聽四方儒人入王檄催孔亟不應彩行百
里而還稱餉缺留如故九月

大清兵取徽州時李自成兵敗奔九宮山爲村民鉏
擊以死楚督何騰蛟以聞其衆無所歸推其兄子李

錦爲主同自成後妻高氏高弟一功等乞降騰蛟與
攝撫堵胤錫往受之一時增兵數十萬王大喜告廟
進騰蛟大學士封定興伯胤錫右副都御史實授湖
北巡撫總制其軍降將皆授總兵官賜李錦名赤心
一功名必正高氏爲貞義夫人號其營爲忠貞營已
而糧不繼降者稍稍散去高李十三部就食施州衛
其餘郝搖旗馬進忠王進才張光翠袁應第牛萬才
張光璧等十餘營悉隸騰蛟麾下軍勢頗振然王內
制於鄭氏不能出關相應援也十月科臣劉中藻頌

諭浙東魯王不受自是閩浙相水火矣原任兵部郎
中王期昇御史彭遇颺至行在加期昇總督銜遇颺
僉都御史大學士路振飛曾櫻封還內傳謂遇颺依
附馬士英期昇在太湖奉朱盛徵稱通城王派餉苛
虐不可用王乃止楊廷麟疏至請王幸江右何騰蛟
請駐湖南浙中諸將請如衢州王以芝龍不足恃欲
出贛入楚倚騰蛟會原任臨清知州金堡朝行在言
騰蛟可倚急宜棄閩幸楚王大喜卽擢堡兵科給事
中決計由贛以赴長沙遣大學士蘇觀生先詣南安

募兵戶部尚書何楷請告去未幾死之十一月甲午類於上帝乙未禋於太廟丙午禡於社稷丁酉以鄭鴻逵爲御營左先鋒出浙江鄭彩爲御營右先鋒出江西駕幸西郊行推轂禮先期爲壇設先帝高皇帝位王御翼善冠詣壇所百官倍位武臣戎服聽事王皮弁升壇拜謁立於神位西南面御營先鋒北面跪兵部授鉞王東向揖之賜餞光祿寺授爵御營先鋒跪受爵誠勞畢謝恩出率將士跪壇下王甲冑誓師乃鳴金鼓揚旌而出當授鉞時風雨晦冥大風陡起

壇上燭盡滅神位皆仆鴻逵出城馬蹶踣地識者以爲不祥下詔親行以唐王聿釗鄧王鼎器監國大學士曾櫻協同芝龍留守以吳震文爲隨營兵部侍郎王覲光爲隨營戶部侍郎皆兼吏戶禮三部事張家玉陳履貞爲隨營兵科亦兼吏戶禮三科事命曹學佺修思宗實錄設蘭臺館以處之十二月甲申王戎服登舟大學士何吾驕等隨行舟次芋江五溪百姓壺漿迎者載道皆賚以銀牌壬寅黃道周師潰婺源被執南贛巡撫劉同升卒命萬元吉兼攝其事

大清順治三年丙戌春正月己酉朔唐王在建寧稱
隆武二年不受朝賀以三大罪自責令百官皆戴罪
從行交趾日本國皆遣使入貢廣東布政使湯來賀
運餉十萬由海道至擢來賀戶部右侍郎馬士英叩
關求入朝王數其罪諭守關將士勿納士英七疏自
理終不許魯監國遣柯夏卿曹維才來聘王加夏卿
兵部尚書維才光祿寺少卿手勅謂朕無子王爲皇
太姪同心戮力共拜孝陵朕有祚土終致於王取浙
東所用職官同列朝籍不分彼此尋遣僉都御史陸

清源解餉十萬犒浙東江防諸軍以散給不平方國
安縱兵奪餉殺清源或曰士英使之也而閩浙釁益
深矣熊開元罷以蘇觀生兼吏兵二部尚書行在文
淵殿大學士出爲經畧賜上方劍便宜行事王御門
賜銀印曰瞻奉南北山陵安集軍民文武官召見泉
州布衣蔡鼎授爲軍師二月馬脛嶺兵變命路振飛
至浦城安撫之江楚迎王疏相繼至詔寬逆案之禁
王曰北京陷于東林南都亡于魏黨厥罪維均今中
興之初嘉運綦新其附黨諸臣概予洗濯以收後効

擢堵胤錫右副都御史巡撫湖廣丁亥大雨雹闕所
無也風霾晝黑對面不相見廣西有僧自稱弘光召
九卿科道議將迎請廷臣曰卽真弘光甫經失國有
尊奉而無迎請已而有司審知其僞下獄誅之嘉亨
俘至下諸王議廢爲庶人以幽死誅其臣顧奕吳之
琮楊國威張龍翼等三月戊申朔督師大學士黃道
周殉節南京王聞慟哭轍朝贈文明伯王將出汀入
贛與湖南爲聲援芝龍使軍民數萬人遮道號呼擁
駕不得行芝龍因具表請回天興王不得已駐劄延

平封成功爲忠孝伯以張肯堂爲留守旋加少保總
制浙直給勅卹便宜從事辛未

大清兵破吉安鄭彩棄廣信奔入關夏四月五日萬
壽節不受賀未幾撫州亦破命禮臣追復建文年號
立方孝孺祠先是汀邵間有大帽山峒蠻最强屢征
不服益宗永寧王慈炎誘之出降以與大兵戰屢
捷遂復撫州大兵圍之鄭彩屯廣信府永寧王請
救其監軍給事中張家玉以三營往援圍暫解已而
復合彩軍潰撫州遂破永寧王死之峒蠻亦散報至

舉朝震驚命削彩職戴罪圖功廷麟元吉退守贛州
大兵追攻之五月琉球國入貢廷試貢生取萬荆等
十二人命爲萃士照庶吉士例送翰林院教習擢湖
廣監軍道章曠爲右僉都御史巡撫湖北魯監國遣
都督陳謙入閩久駐衢州持兩端自云魯已爵爲侯
欲邀封召赴行在御史錢邦芑劾其外媾下獄將殺
之芝龍與謙有舊亟入朝請以官贖謙死王故留芝
龍久語密促行刑芝龍出已死矣因厚殮之由是益
懷異志加吏部尙書郭維經六省督師銜募兵援贛

時贛已被圍兩月巡撫劉廣胤戰敗受執援兵皆不
敢前六月開科取士命廣額七十名流寓者皆入試
以編修劉以脩閔肅爲主考舉葉瓊等一百七十五
名士子多以賄進乃命覆試落四名逮同考推官王
三俊下獄追贓一萬兩兵部侍郎前南贛巡撫李永
茂遣粵兵五千援贛與

大清兵戰於李家山圍暫解粵兵退守南康時贛城
堅守已久奉諭獎勞賜名忠誠府加楊文薦右都御
史偕郭維經出閩入援與楊廷麟萬元吉等爲協守

計浙東報至 大兵已渡江取紹興魯監國航海去
江上諸師盡潰鴻遠駐城外警報我兵至乃徒跣而
逃三日抵浦城事聞行在大震削其封爵秋七月元
子生大赦加恩從興諸臣悉進爵御史錢邦芑言浙
東新破唇亡齒寒舉朝正切同仇之日非蒙恩受賞
時也不報己巳王御門內侍捧小匣置御前詔諭羣
臣曰朕本無利天下心以勲輔擁戴不得已勉徇羣
策浣衣糲食有何人君之樂朝夕乾惕恐負重紂豈
意諸臣已變初志昨巡閱之使得爾等出關迎降書

二百餘封今俱在此朕不欲知其姓名也今命錦衣
衛焚之午門前爾諸臣其有名者尙洗心滌慮否儻
能竭節奉公不渝終始是所望也王長身豐頤聲如
洪鍾聞者悚息時銳志出贛芝龍百計阻之欲留王
以自重旣而陰通款於洪承疇托言海寇至馳還臨
安盡撤關隘水陸諸兵隨之去

大清兵旣破浙東長驅而前仙霞嶺空無一卒遂如
入無人之境焉何騰蛟遣郝永忠以鐵騎五千迎駕
將至韶州 大兵已出衢州於八月乙未抵仙霞關

守浦城巡按御史鄭爲虹治餉兵科給事黃大鵬延
平知府王士和死之丁酉王自延平出奔宮眷皆騎
猶載書十餘篋以從輔臣吾騶繼祚等隨行庚子入
汀州城辛丑大兵奄至有十餘騎叩城稱扈蹕者
開門納之則追騎也直入行宮從官迸散乃執王與
曾妃去妃至九瀧潭投水死王死於福州其從難之
臣有部郎賴垓給事中熊緯御營總兵胡上琛等或
曰建寧代死者爲唐王聿釗汀州代死者爲張致遠
王實未死後鄭成功屯兵鼓浪嶼有遣使存問諸臣

者云爲僧於五指山然亦莫必其真僞也是冬十月
贛州破督師大學士楊廷麟兵部尚書江廣總督萬
元吉俱赴水死吏部尚書郭維經御史姚竒胤入嗟
峨寺自焚死湖西分巡道彭期生自縊死兵部主事
周瑚被執不屈戮之右都御史楊文薦擒至南昌絕
粒死後以聞難繼死者御史艾南英縊於汀州僧舍
大學士蔣德璟於泉州不食而卒粵中永明王立遙
上尊號曰思文皇帝丁酉春復謚曰紹宗襄皇帝
勘本曰闖賊敗走九宮山爲村民鋤死事在九月

原本載於楊廷麟萬元吉以義師守贛之下錯譌甚矣其李錦高一功等乞降下至浙中諸將請如衢州一節原闕又卷末是冬十月下贛州殉事諸臣及後聞難繼死者原本皆闕書今悉從正史改正纂入

南疆繹史勘本卷三終

南疆繹史勘本卷四目錄

雪川溫氏原本

古高易氏勘定

紀畧四

永明王上

右粵中紀畧第四○嗟夫粵中之立國也僅矣崎嶇黔粵之間與蠻獠雜處搶攘竄越幾不暖席然猶支撐傾側歷十五年其始也瞿嚴綢繆於內何堵捍禦於外陳張之徒義旗雲舉輯忠

貞營數十萬之衆分疆駐守然後金王反正於江右成棟投戈於粵左李王楊沐經營滇蜀駸駸乎畫江漢而守之似可有爲矣然進寸退尺朝得夕失倉卒不能稱有樹立蓋大命有歸強陽餘閏固天之所不能庇者也自瞿何致命而後文吏偷安武將驕暴倚寇盜爲長城託絕域以寄命蝥賊內訌忠良屠戮而遺燼以息詩曰人之云亡邦國殄瘁豈不諒哉

南疆繹史勘本卷四

紀畧四

永明王諱由榔神宗之孫桂恭王常瀛少子也常瀛李貴妃出萬厯二十九年封天啓七年恭王就國衡州衛在江湖之表地僻遠崇禎九年封由榔爲永明王十六年張獻忠陷衡州王由永州入粵西爲賊執繫道州征蠻將軍楊國威遣部將焦璉率兵至攀城破械出之王病不能行璉乃負王以趨渡河始得免乙酉南都覆牘東在籍尙書陳子壯將奉恭王監國

會閩中唐王立遂寢議是年恭王薨於蒼梧遂葬焉
長子安仁王由樛襲封旋病卒丙戌春閩中遣司禮
太監龐天壽冊王爲桂王居肇慶府秋九月

大清兵下汀州唐王聿鍵就執粵中總督丁魁楚巡
撫瞿式耜巡按御史王化澄與舊臣呂大器李永茂
晏日曙湯來賀董天閔朱治憫周鼎瀚朱容藩方以
智林佳鼎程源等議所立乃共推永明王昔者唐王
嘗語羣臣曰永明神宗嫡孫統系最正朕無子後當
屬諸時桂太妃王氏曰諸臣何患於無君吾兒仁柔

非撥亂才願更擇可者魁楚等請之堅遂以冬十月
十一日壬午監國肇慶祭告天地宗廟以魁楚爲東
閣大學士兼戎政尚書大器大學士兼兵部尚書式
耜大學士兼吏部右侍郎攝尚書事永茂請終制化
澄以下皆進秩有差壬辰湖廣督師大學士何騰蛟
巡撫兵部右侍郎堵胤錫等上表勸進優詔答之司
禮監太監王坤至自汀州知唐王已殂羣臣請卽位
是月

大清兵破贛州魁楚聞報與太監王坤倉卒奉王奔

梧州福王舊輔蘓觀生粵人也嘗貽書魁楚欲預擁
戴功遣陳邦彥來勸進魁楚與觀生素不協拒之觀
生乃自南韶還師適唐王弟聿鏞浮海至廣州十一
月癸卯朔觀生與布政使顧元鏡總兵林察等擁聿
鏞入廣州城自立僞號紹武招海上鄭石馬徐四姓
盜授總兵官以與肇慶相拒甲寅王還肇慶先是王
出奔時式耜等力爭之不得至是定議迎還於庚申
卽位稱號永曆追尊皇考曰瑞皇帝尊繼母太妃王
氏爲皇后生母馬氏爲皇太妃册妃王氏爲皇后上

隆武尊號曰思文皇帝大赦封太后弟王國璽武靖
伯皇后父王畧長洲伯太妃姪馬九功鎮遠伯使給
事中彭耀宣諭廣州觀生殺之乃以兵部侍郎林佳
鼎總督兵事樂觀生於三水佳鼎故粵中監司與林
察同姓相善察使羣盜詐降佳鼎信之十二月甲戌
乘勝追至三山口亂作全師皆覆佳鼎同僉事夏四
敷赴水死肇慶大震復以王化澄爲兵部侍郎代佳
鼎督師尙書呂大器辭官入蜀卽以化澄行尙書事
李永茂爲大學士未幾亦罷去時

大清遣巡撫佟養甲總兵李成棟提兵由福建趨惠潮俱下之望日丁亥潛師襲廣州執聿鏞觀生自縊祭酒梁朝鍾太僕寺卿霍子衡等死之餘皆降聿鏞與周益遼等二十四王俱及于難報至肇慶式耜請守峽口太監王坤不從乃以朱治憫爲兩廣總督守肇慶奉王復走梧州是月大兵取四川張獻忠伏誅

大清順治四年丁亥春正月癸卯朔永明王在梧州稱永曆元年李成棟分兵徇南韶自率勁卒抵肇慶

朱治憫走之城破王由梧州走平樂丁魁楚走岑溪王化澄走潯州皆棄王去從者惟瞿式耜吳貞毓吳炳等李成棟別遣將下高廉雷三府癸亥王由平樂抵桂林欲幸楚遣使湖南慰勞督師定興侯何騰蛟等並趣其兵入衛乙丑梧州破廣西巡撫曹晁降兵科給事中陳邦彥起兵於高明兵部右侍郎張家玉起兵於東莞徵四川吏部尙書文安之雲南吏部侍郎王錫袞入閣道阻不至乃以翰林學士方以智爲東閣大學士同式耜入閣辦事未幾以智爲僧去錫

袞尋爲沙定洲所殺以周堪賡郭都賢劉遠生等爲
六卿丁時魁金堡等爲給事中當是獻忠部將孫可
望等由蜀至黔轉入雲南丁楚魁入岑溪輜重累多
舳艫相屬爲大兵追及薙髮以降李成棟與有隙
錄其家數百人殺之魁楚乞一子成棟笑曰汝身且
莫保尙求活人耶至藤江并殺之平樂亦不守桂林
聞報大恐會武岡鎮將劉承胤以兵至全州王坤請
赴之二月丙戌王如全州瞿式耜極陳桂林形勢請
留不聽因自請留守與城存亡許之進文淵閣大學

士兼吏兵二部尚書督師賜劍便宜從事以總兵新
興伯焦璉兵隸麾下封劉承胤安國公陳邦傳思恩
侯守昭平錦衣指揮馬吉翔郭承昊嚴雲從等皆爲
伯御史毛壽登爭之吉翔怒激承胤脅王杖壽登並
劉湘容吳德藻萬六吉於牙門外承胤又爲申救得
免皆奪職以禮部尚書吳炳兼東閣大學士入閣辨
事承胤以五千人援桂林挾王歸武岡州三月癸亥
王至武岡改曰奉天府以岷王府爲行宮
大清兵攻桂林與焦璉連戰城下退屯昆陽封式耜

臨桂伯璉新興伯是時長沙常德俱失何騰蛟與郝永忠等退保衡州張先璧走寶慶堵亂錫走永定衛忠貞營李赤心等攻荊州不克潰入歸巫兩江間馬進忠王有才等遁五溪山中先承亂所遣桂林援兵在城與焦兵王客不和擊傷璉大掠而去式耜檄誅首惡二十餘人劾承亂馭兵無狀武岡遠在寶慶西惟依承亂爲重政事皆取決焉承亂遂專恣益甚夏六月庚午朔何騰蛟朝行在王慰勞再三賜金幣以趙印選胡一青兵隸之承亂前在湖南以騰蛟薦受

節制騰蛟以藤溪之捷請加永忠援勦左將軍先璧右將軍承亂怒至是以長沙不守奏解騰蛟兵柄王乃密召騰蛟入將以圖承亂也先璧劾承亂專擅騰蛟翻和解之大學士陳子壯起兵九江鎮與張家玉等破東莞高明諸縣秋七月甲辰進圍廣州不克命騰蛟督諸鎮兵守衡州未至衡州已破永忠等南走騰蛟退保永州湖南巡撫章曠徇永安卒於軍八月己巳朔以戶部侍郎嚴起恒爲東閣大學士壬午大清兵破寶慶直趨奉天城外劉承亂拒戰敗績舉

城降叅將謝復榮戰死馬吉翔等奉王及兩宮斬關
出夜走靖州出古泥總兵官侯性司禮太監龐天壽
將兵入衛以舟來迎由通道縣入蠻境達柳州會天
雨宮眷內豎狼籍泥淖中饑餓無人色性供帳儲備
王喜封性商邱伯以天壽掌司禮監印大學士吳炳
扈世子以行中道被執死之九月王在柳州式耜請
回桂林 我兵李成棟破清遠兵科給事中陳邦彥
被執不屈見殺冬十月土司單鳴珂與守道龍文明
挾讐相攻陷柳州文明走鳴珂大掠城中矢及王舟

丁丑王南走象州兵部尙書張家玉兵敗死之時
大清兵已定湖南西入黎平永州亦破郝永忠盧鼎
等俱還桂林何騰蛟與嚴起恒劉湘客隨至與留守
瞿式耜議分地給諸將俾各自爲守式耜督焦璉兵
已先復陽朔及平樂府陳邦傳亦由濱州復潯州合
兵復梧州粵西全省稍定十一月丁酉朔王回桂林
式耜與起恒化澄並入直騰蛟督師出全州王坤龐
天壽掌司禮監事
大清兵破高州大學士陳子壯被執不屈磔死

大清順治五年戊子春正月丁酉朔王在桂林稱永
曆二年巡按御史錢邦芑疏報四川全省恢復九州
一百三十餘縣王視朝受賀叙全州功晉騰蛟定興
侯柱國太師兵部尚書趙印選新寧伯胡一青興寧
伯焦璉新興侯封王祥等侯伯職有差擢邦芑右僉
都御史巡撫四川癸亥江西提督金聲桓王得仁叛
大清以南昌內附二月 大兵至靈州廣東巡撫佟
養甲與總兵李成棟亦叛之以地內附郝永忠之兵
潰於興安奔還桂林縱兵大掠挾王夜走南寧滇營

兵亦入城縱火相攻朝士皆被戮辱騰蛟在永福聞
警馳回與式耜同調諸鎮兵入城守禦三月丁巳
大清兵至桂林北門式耜城守騰蛟等拒戰卻之時
大兵聞江西叛遂旋師金聲桓使人間道賫佛經置
密疏其中赴南寧輸款以禮部侍郎朱天麟爲禮部
尚書旋進東閣大學士王應熊卒進呂大器爲少傅
盡督西南諸軍代應熊賜劍便宜從事閏三月丙寅
朔王子慈烜生大赦正妃王氏出夏四月乙未朔遣
吏部侍郎吳貞毓商邱伯侯性勅勞李成棟于廣東

封惠國公并封佟養甲襄平伯五月何騰蛟復全州
壬午復寶慶六月甲午朔王幸潯州封陳邦傳慶國
公秋七月甲子朔次梧州謁興陵成棟請移駐廣東
使其將羅成耀率甲士五千迎駕瞿式耜請回桂林
衆議肇慶監國之地居兩省中遂移居焉八月癸巳
朔王還肇慶拜成棟翊明大將軍以其子李元胤爲
錦衣衛指揮使掌絲綸房事袁彭年爲左都御史彭
年以廣東布政使與成棟密謀內附者也宗室朱容
藩自稱楚世子天下兵馬副元帥建行臺於夔州督

師呂大器傳檄諸路聲其舉命川將李占春誅之九
月召舊輔何吾騶黃士俊入閣冬十月何騰蛟攻永
州衡州克之成棟命其子元胤以兵三千宿衛遂爲
禁旅是時江西廣東俱復惟贛州爲高進庫所守金
聲桓使王得仁攻之不能克命成棟率師助之比成
棟至而

大清兵已抵南昌得仁還救成棟戰不利退屯南康
十一月盜殺佟養甲於梧州李赤心與大兵戰破
線國安於湘潭遂復益陽湘潭湘鄉衡山等縣堵亂

錫圍長沙十二月辛丑朔封李元胤南陽伯馬吉翔
文安侯長沙告急諸將潰騰蛟退保湘潭

大清順治六年春正月庚申朔王在肇慶稱永曆三
年壬申朱天麟罷戊寅南昌破金聲桓王得仁皆死
二月庚寅朔湘潭破馬進忠敗走督師定興侯何騰
蛟被執不屈至長沙死之李成棟亦敗於信豐渡河
墮水死事聞王震悼贈騰蛟中湘王諡忠烈成棟寧
夏王聲桓南昌王設壇祭之以杜永和爲兩廣總督
駐廣州羅成耀守南雄忠貞營之衆亦潰於茶陵由

道州入粵西堵胤錫以胡一青趙印選兵守衡州三
月

大清兵至胤錫走道州衡永二府俱不守夏四月孫
可望遣使奉表投誠請封王爵廷議不可可望自丁
亥春入滇據有全省稱國主以干支紀年其黨李定
國等抗不相下雲南監軍楊畏知誘之來歸冀得封
以制其黨議久不決武康伯胡執恭駐思恩便宜矯
冊印入滇封可望爲秦王而肇慶不知也六月己丑
朔堵錫亂至肇慶加文淵閣大學士封光化伯使招

李赤心等出楚秋七月實封可望爲平遼王賜名朝
宗劉文秀李定國艾能奇等皆爲公可望卻不受冬
十月己丑馬進忠王進才克武岡乙卯克寶慶靖州
何吾騶王化澄罷封黔鎮皮熊爲匡國公滇鎮王祥
爲忠國公防守滇黔十一月辛巳督師大學士堵胤
錫卒於潯州贈潯國公十二月戊申以史館之員王
親試士取劉蒞錢東錫楊在李來吳龍楨姚子壯涂
宏猷楊致和八人俱授庶吉士 大兵入粵東羅成
耀自南雄遁回

大清順治七年庚寅春正月乙卯朔王在肇慶稱永
曆四年己未聞庾闕不守問備禦之策羣臣無對辛
酉王登舟戊辰韶州復破辛未王西幸問戎政尙書
劉遠生給事中金堡宣諭廣州諸將令杜永和出師
畱馬吉翔李元胤居守庚辰王至梧州駐舟江干內
閣王士俊以疾歸召朱天麟入直二月
大清兵至廣州圍之調陳邦傳高必正等東援丁亥
戶部尙書吳貞毓等合疏論袁彭年金堡丁時魁蒙
正發劉湘容朋黨誤國十大罪王以彭年反正有功

置不問餘下錦衣獄遣戍戊戌大兵破武岡馬進
忠退守靖州三月己未卯刻日赤如血五月必正與
邦傳相讐殺率所部西回惟邦傳出屯肇慶馬寶等
襲清遠敗歸李元胤馬吉翔進駐三水觀望不敢進
而梧州郝永忠惠州黃應傑俱已降廣州被圍日久
不能救惟進封杜永和等爲侯以虛名慰勞而已六
月文安之入朝命入閣辦事秋八月孫可望復遣使
至梧州自稱秦王且以不願改號爲請付從官集議
九月可望由雲南東襲貴州皮熊走清浪追執之奪

其兵又使賀九儀襲遵義滇鎮王祥師敗自刎死于
是張先璧馬進忠等皆歸可望勢益強地與粵西相
接矣冬十月辛巳朔日有食之十一月辛亥廣州破
范承恩降杜永和奔瓊州甲寅桂林破留守大學士
瞿式耜總督兵部侍郎張同敞皆死之初衛永俱破
胡一青趙印選等南走粵式耜命與焦璉楊國棟等
扼榕江既而全州復破榕江盡潰報至梧州乙卯王
乘曉船夜發比曉從官踉蹌遁走陳邦傳在清遠聞
廣州失飛帆先歸劫從官於藤江部郎潘駿觀童英

許王鳳等皆被殺內閣王化澄吏部尙書晏清等俱
走北流不得達馬吉翔李元胤追及於南寧從官稍
集饑凍無大色乃括行囊并吉翔所獻金四千散給
之趙印選胡一青率滇兵駐瀆州袁彭年自佛山遁
復投大軍降十二月命文安之出督師經畧川秦楚
豫封趙印選爲開國公胡一青爲衛國公王光典等
俱爲侯伯所謂十三家之兵也

南疆

繹史勘本卷四終

五保堂

